

Inatsisartut Suleriaasianni § 32, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni Kalaallit Nunaanni Inatsisartut aallartitaasa siulittaasuat, Josef Motzfeldt, imaattumik aalajangiiffigisassatut siunnersuuteqarpoq:

Nunat Avannarliit Killiit Siunnersuisoqatigiiffiata aalajangersagaa nr. 4/2009 Inatsisartunit taper-serneqarnissaa pillugu Inatsisartut aalajangiiffigisassaattut siunnersuut, aalajangersagaaq ima oqaasertaqarpoq:

Nunani avannarlerni killerni ungasianit ilinniartitsineq pillugu pisortigoornerusumik suleqatigiinnermik misilittagaqarfiusussamik tunngavissiisumillu misiligitut suliniummik aallartitseqqullugit Islandimi, Savalimmiuni aammalu Kalaallit Nunaanni naalakkersuisut Nunat Avannarliit Killiit Siunnersuisoqatigiiffiannit kaammattorneqarput.

(Josef Motzfeldt, aallartitat siulittaasuat)

Tunngavilersuut:

Ulloq 4. – 7. august 2009-mi Kalaallit Nunaata kujataani Nunat Avannarliit Killiit Siunnersuisoqatigiiffiata immikkut qulequtaqarluni ataatsimeersuarnerani ilinniartitsisunut kalaallinut savalimmiormiunullu ungasianit ilinniartitsinermik Islandip periusaa pillugu aalajangersimangitsumik tunngaveqarluni oqallinneq aallartinneqarpoq, tamatumani ilinniartitsisut taakku Islandip universitetiani ungasianit pikkorissartitsineranut ilanngussinnaallutik, tassami universitetimi tassani ilinniartitsisut tuluit danskillu oqaasii atorlugit ilinniartitsisinnaammata. Taamaalilluni siunnersuutigineqarpoq Nunat Avannarliit Killiit Siunnersuisoqatigiiffiata suliassaqarfiani misiligummik suliniut aallartinneqassasoq, tamatumani pisortatigoornerusumik suleqatigiinnissamut misilittakkanik tunngavissanillu aallertoqarsinnaalluni siunissami suliassaqarfinnut arlalinnut atorneqarsinnaasunik.

Islandip Universitetiani Ilinniartitaanermut Institutip ungasianit ilinniartitsinera

- 1) Ilinniartitsisunik ilinniartitsinermut instituti inunnut sumiiffinni avinngarusimasuniittuni ilaatigut ilinniartitsisutut suliffeqareernertik pissutigalugu nalinginnaasumik ilinniartitaanermi peqataasinnaangitsunut ilinniartitsisutut ilinniartitaanermik ukiut 15-it missaanni neqeroruteqartarpoq. Pikkorissartitsinerit ilaanni ilinniarfimmiiinnissaq piomasagaataangilaq, ilaannili ilinniartitsissutut immikkoortuata ingerlanerani marloriarluni-pingasoriarluni sivi-kinnerusumik ilinniarfimmiiinnissaq piomasagaataalluni. Taamaalilluni Islandip Universitetia ilinniartitsisunut ungasianit ilinniartitsinermi pikkorissartitsinissamik arlalinnik neqeroruteqarpoq, tamatumani Akureyrimi universitet assingusumik neqeroruteqarluni ilinniagaqartut Kalaallit Nunaanneersut Savalimmiuneersullu ungasianit ilinniartinneqarsinnaassallutik.
- 2) Ungasianit ilinniartitsinissamut instituti annertuumik tunngavissaqartutut imminut nalilerpoq, tassa makku pigigamigit:
 - a. Professorit ungasianit ilinniartitsinermut immikkut ilisimasallit arlallit
 - b. Teknikikkut ikorfartuisinnaasut piginnaaneqarluartut.
 - c. Ilisimatusarnermi suliniutit arlallit, tamatumani ilinniartitsisunik ungasianit ilinniartitsinermik aallussiffiusut. Ilinniagaqartut ilaat ilinniartitsisutut ilisimaneqarluartoq misilittagalillu ph.d-tut ilinniarnini naammassilerpaa, tamatumani Islandip kitaani ilinniartitsisunik ungasianit ilinniartitsinerup nukittoqutai sanngiiffiilu immikkut sammisaralugit aammalu ilaatigut ilinniartitsisut qanoq ineriartortinneqarnissaannut, ilinniarfiit qanoq sunnerneqarnissaannut kiisalu ilinniartitsisutut ilinniartitaanermi sammisassat suliniutumut qanoq sunniuteqarnerannut tikkuussilluni.

- 3) Islandimiut oqaasii atorlugit ilinniartitsineq ingerlanneqarnerusarpoq, ilinniartitsisulli amerlanerit tuluit danskillu oqaasii atorlugit ilinniartitsisinnaapput.

Kalaallit Nunaannit aallartitat Islandip Universitetiata ilinniartitsisunut kalaallinut ungasianit ilinniartitsinermik neqerooruteqarsinnaanera soqutigintippaat siunnersuutigalugulu Kalaallit Nunaanni ilinniarfiit, soorlu Ilinniarfissuaq, Perorsaanermik Ilinniarfik aammalu ilinniartitaanermik ilisimatusarnermik instituti oqaloqatigiinnerit nangeqqinneqarnissaanni ilaatinneqarsinnaasut. Taamaattoqassappat ilinniartitaanermik ilisimatusarnermik institutip ukiup naanerani pikkorissartitsinernik neqeroorutaanut nutaamut Islandimi pikkorissartitsinerit neqeroorutigineqartut ilanngunneqarsinnaassapput.

Aningaasaqarneq

Aaqqissuussinerup aningaasaqarnikkut kingunerisassai paasiniarlugit ataatsimeeqqinnissat isumaqatigiinniaqqinnissallu pisariaqassapput.